

سفاته کات

اورغ کریستین سرات دنیا - معنائ قوم کلوارک
 عیسی المسیح - تاگیرا بغسا مان ۲ فون ، فوجی
 کا توهن اتس کتاب ۲ سوچی هق توهن بری ده کادی.
 کتاب ۲ توهديه درفد توهن ، هق اد هرک سوغکوه ۲.

تافي اد ستغه اورغ لاین براس سک هاتي ،
 اد سوال ۲ هق دي نق تان دولو ، بارو نق بوليه
 کي باج کتاب توهن تو .

موداهن ۲ سورت هالوس ني نق تولوغ جواب
 سوال ۲ ادیق کاکق هق سک هاتي سروف تو ، سهیغک
 دي جوغ نق باج کتاب ۲ تو ، بارو تاهوکات مولیق
 سوغکوه ۲ .

کوروا کتاب انجیل

34 جالن گنچنا 1

چغواد جالا . 95000

تاهون 1986

سؤال ۱

کتاب ۲ مان هق اورغ کریستین کنا فکغ کات
کتاب ۲ سوچی هق توهن بري ؟

جوابن

کیت فکغ کات جمله کتاب ۲ اتوا سورت ۲ سوچی
هق توهن بري تو ، سموان اد 66 بواه . 66 بواه
سورت ني بولیه تمو سوکو ۲ ، تاخي کباپکن دي
کنا جاهیت بوات بري ماسوق جادي ساتو بواه کتاب
هق بسر .

کتاب ساتو بواه هق بسر تو ، اورغ کریستین
فکگیل کتاب توهن (BAIBEL) ، الکتاب ، اتوا کتاب
سوچی فون بولیه . دشن بهاس تهائي نام دي

• พระคริสตธรรมคัมภีร์

فواق کریستین فرچاي کات توهن یغ سا نق
بري سموا اورغ ، کنف ۲ بغسا ، بولیه باچ اتوا دغر
فرکتان توهن دشن بهاس دي سنديري ، نق بري
بولیه ارتي دشن چوکوف سمفرن . سبب توله
اهلي ۲ کتاب بالیق کتاب توهن هیفگ سمفي ماس
لاني کتاب توهن تو اد لبیه فد 1,400 بهاس ده .
کتاب توهن ني اد جوال سرات دنيا کنف ۲

تاهون ، برجوتا ۲ ، سهيڻگ بوليہ کات لاکو فدکتاب ۲
اتوا سورت ۲ لائين سموا .

کتاب توهن اد دوا بهاکين هق مستحق .
اچف ۲ بوليہ تمو دوا بهاکين تو سوکو ۲ ، جادي
دوا بواه کتاب ، دوا بهاکين تو کيت فڱيل کتاب
فرجنجين لام دڱن کتاب فرجنجين بارو .

سوال 2

کتاب فرجنجين لام ماري د مان ؟ جادي لاکو مان ؟

جوابن

هق کيت فڱيل کتاب فرجنجين لام تو ،
سسوڱکوهن ايسي دي اد 39 بواه کتاب اتوا سورت .
ليم بواه کتاب هق مولا ۲ سکالي تو ، سموا اورڱ
فڱيل دڱن نام سا ، يائيت کتاب توراۃ . فس
اد لائي کتاب زبور دڱن کتاب نبي ۲ دولو ،
ترماسوق کتاب نبي سليمان دڱن کتاب نبي ايوب .

اصلن سورت ۲ ني سموان تولىس دڱن بهاس
عبراني . مڱيکوت کيرائن اهلي ۲ کتاب ، نبي
موسی منوليس کتاب توراۃ لبيه کورڱ 3,300 اتوا

3,400 تاهون ماري ده . بايق اهلي كتاب فهم
 کات کتاب نبي ايوب اد ده بلوم فد کتاب تورا
 لاکي !

دغن کران دي لام ساغت ، تا' اد سیاف
 بوليه رويت دغن تنتو تمفت هاري بولن اتوا
 تاهون هق کتاب^۲ هق لام ني کنا تولىس .
 سوڭکوه فون جادي بالس تو ، تافي کيت تاهو
 دغن تنتو کات سمو کتاب^۲ اتوا سورت^۲ هق
 ماسوق دالم کتاب فرجنجين لام تو ، اد سيف
 سمفرن ، لبیه کورڭ 2,300 تاهون ماري ده ، يايت
 دالم 400 تاهون بلوم فد عيسى المسيح برانق
 د دنیا .

جادي ، انتوق کرج^۲ تولىس سورت 39 بواه
 دالم کتاب فرجنجين لام تو ، توهن تا' فاکي
 سئورڭ ساج فنولىس ، دق ، تافي بايق اورڭ .
 فس ، امبيق د ماس توهن مولاي تورون
 کتاب^۲ تو ، هيڭک سمفي چوکوف سمفرن ده ،
 کرج تولىس سورت^۲ تو مکن ماس لبیه کورڭ
 1,000 تاهون .

سوال 3

فس ، كتاب فرجنجين بارو فول ، ماري د مان ؟
جاڊي لاڳو مان ؟

جوابن

كتاب فرجنجين بارو - يايت كتاب انجيل -
ايسي دي اد 27 بواه سورت . سموا سورت 2 دالم
كتاب انجيل اصلن بهاس ڪريڪ بلاڪ . فرڪتان
انجيل هق سبوت سائي ، اصلن بهاس ڪريڪ ،
فس معنا دي خبر يڻ بائڪ .
سموا سورت دالم كتاب انجيل رويت خبر
بائڪ چارا حال عيسى المسيح برانق كا دنيا ، فس
هق دي بوات نق بري مائسي ڪيت سلامت . اد
جوڪ سورت 2 هق بري تاهو چارا حال خبر بائڪ تو
مولائي ملارت ڪي رات 2 ، فس اد جوڪ فهاجران
انتوق اورڻ هق فرچاي كا عيسى ده .
توهن فائي لبيه ڪورڻ سفولو اورڻ جاڊي
جورو توليس 27 سورت دالم كتاب انجيل ، فس
سموا تو چوڪوف سمفرن دالم ماس 50 تاهون
لفس فد عيسى نائيڪ ڪليق كا شرڪ ، لبيه ڪورڻ
1400 تاهون ماري ده .
اورڻ جورو فنوليس سفولو اورڻ تو ، ڪباپقن

جادي سقسي اتس فرکارا ۲ هق دي بياس تیغوق
 دغن مات دي سنديري . اتوا فون ، اد جوک ، اورغ
 سروف لوقس ، هق رويت حال ۲ هق توهن بري
 دي توليس بالس ني :-

امب سنديري سوده فريقسا کليه دغن مالوس
 مالوسي سموا فرکارا ني ، نق تاهو هق مان هق
 سجاتي . سبب توله فاتوت امب کنا کارغ سموا
 ني ، بوبوه دالم ساتو سورت انتوق توان .
 بالس تو ، توان ۲ بوليه تاهو دغن تنتو کات ،
 دالم سموا فرکارا هق توان بياس دغر ، هق
 مان سوغکوه . (لوقس ۱: 43)

بفکالي اديق کاکق هق دوق باچ سورت ني ، نق
 براس ترکجوت بيلا دغر جوافن تو ، سبب اد جوک
 اورغ هق فهم کات عیسی المسيح سنديريله هق کارغ
 کتاب انجيل . اتوا ، بفکالي اد جوک اورغ هق فهم
 کات توهن توروون کتاب انجيل اتس عیسی المسيح .
 تافي سسوغکوهن دق .

ولو فون عیسی المسيح سنديري تا توليس کتاب
 انجيل تو ، فس تا بياس فکغ کتاب انجيل ساتو
 بواه فون دتاغن دي ، تافي عیسی اد ساتو کلاران ،

اتوا فڱكيلن ، هق مستحق . ڳلاران تو يائت
 فركتان توهن . معنات عيسى المسيح سندريله
 جادي فركتان توهن هق تورو ماري د شرڳ .

سوال 4

کالو ڪتاب فرجنجين لام دڻن ڪتاب انجيل
 سائني ڪتاب ۲ هق مائسي ڪارڻ ساڄ ، سبب
 اف بوليہ فڱكيل دي فركتان توهن ؟

جواب

موليق ڪيت هورائي بري فهم لاکو مان مقصود
 فركتان فركتان توهن تو .

تافي بلوم فد تو ، ڪيت نق تان سيڪيت دولو .
 توهن بياس برهوبوڻ دڻن مائسي کو جالن مان ؟
 دالم ڪتاب سوچي هق توهن ، ڪيت بوليہ تاهو

ڪات اد بايق جالن هق توهن بياس برهوبوڻ دڻن
 نبي ۲ فس اورڻ ۲ لائين ، سروف دباوہ ني :-

1. تڪہ ۲ توهن برهوبوڻ ملالوئي کو ملائڪہ ۲ .
2. تڪہ ۲ کو مولوت نبي ۲ اتوا کو جالن ڪتاب نبي ۲ تو
 فون .

3. اد جوڳ تڪہ ۲ توهن برفرمان ، بري مائسي بوليہ
 دڦر سوارا دي جوڳ .

4. فس اد جوک تکه ۲ توهن کيچيق سلالو دغن

هاتي مائسي .

ترحيرانله فرکارا تو ، تافي سسوڅکوڅن توهن يځ
مهاسوچي برکهندق نق برهوبوڅ دغن مائسي کيت .

سبب توله ، بيلا توهن برکهندق نق تورون
فرکتان دي کا مائسي ، بري اد کتاب هق سوچي ،
روح توهن سنديريله تورون اتس نبي ۲ اتوا جوړو
فنوليس تو ، برکرق هاتي دي بري دي توليس ، فس
هق دي توليس تو ، ايکوت کهندق توهن ساج . اد
ايات کتاب رويت سروف تو جوک ، کات ، خبر هق
توهن تورون کا مائسي تا بياس تورون ايکوت
فيکيران نبي ۲ سنديري ، تافي کو روح توهن هق
بري نبي ۲ فندي رويت خبر تو .

سسوڅکوڅن توهن يځ مهاکواس تا کنا فاکي
مائسي بري تولوڅ لاکو تو ، تافي کتاب تورا
رويت کات توهن لتق مائسي هق مولا ۲ تو ، بري
جادي واکيل هق توهن ، انتوق بوات کرج مريسته
دنيا . فس ، سمفي کا ماس لاني فون ، توهن
دوق فاکي مائسي انتوق کرج ۲ توهن ، اکوت کهندق
دي .

جادي ، توهن سنديريله هق فيليه نبي^۲ دغن
 اورغ جورو تولىس تو ، انتوق تولوغ مپمفي فرمان
 توهن كا مائسي كيت دالم كتات توهن .
 تافي جاغلله اديق كاكق سيلف فهم ! بوكن كنفا^۲
 فاته دالم كتاب سوچي هق توهن ، هق كيت بوليه
 كات توهن سنديري فرمان ، اتوا كنفا^۲ ايات هق ايسي
 دي توهن ستوجو كات فيكيان دي ، دق !
 دالم كتاب توهن اد جوگ بايق فركتان هق مائسي
 ساج كيچيق ، ايكوت فيكيان هق دي سنديري .
 ميسل سروف دالم كتاب نبي ايوب ، اد بايق ايات
 هق رويت چارا حال سائين^۲ نبي ايوب دوق بحس
 دغن دي . فس بايق هق فواق سائين نبي ايوب
 سيلف فهم . تافي سود سكالې توهن سنديري
 فرمان ، هورائي بري بتول هق فواق تو تاء فهم .
 سوغكوه فون جادي لاکو تو ، تافي بيلا توهن
 برکرق هاتي نبي ايوب ، بري دي تولىس چارا حال
 فرکارا^۲ هق فواق سائين دي كيچيق تو ، توهن
 سوروه تولىس بلاک ، تاگيرا هق موليق ، تاگيرا هق
 سيلف . سموا ني جادي چونتوه انتوق بري فايده كا
 اورغ هق باچ كتاب تو ، بري دي تاهو دغن تنتو هق
 مان بتول ، هق مان سالا .

بالس توله کیت کات کتاب سوچی تو جادی
فرکتان توهن .

سؤال 5

سبب اف اورغ کریستین تریما باچ کتاب نبی ۲
دولو ماس لانی ؟ کتاب هق سود سکالی ساج
هق کیت کنا باچ ماس لانی ، سبب هق دولو
اتوا هق لام تو لیسوس ، تاء ترفاکی ده .
هق تو سوغکوه کا دق ؟

جوابش

تاء سوغکوه . کیت تاء نمفق کات توهن بری
کتاب هق بارو کنتی هق لام . تنتوله کالو توهن
اد توجوان لاکو تو ، دی کنا رویت بری تاهو جوگ .
تافی دالم کتاب ۲ توهن تاء اد سبواه هابوق هق رویت
بالس تو .

سبالیقش ، اد ساتو ایات دالم کتاب فرجنجین
بارو - یأیت کتاب انجیل - هق رویت چارا حال
کتاب توراۃ ، کتاب زبور ، دغن کتاب نبی ۲ دولو .
ایات سانی بری کیت تاهو دغن چرف توجوان توهن
تورون کتاب هق بارو تو ، بوکن نق کنتی هق لام .
نیله فرکتان هق عیسی المسیح سندیری دالم

جاغن سیاف ۲ سڱ کات توجوان اکو ماري کا
 دنيا ، نق مڱنانة حکوم ۲ دالم کتاب توراۃ
 اتوا کتاب نبي ۲ لائين فون . تنتو دق ! اکو
 ماري ني نق بري سموا حکوم ۲ تو سمفرن .
 (متیوس 17:5)

اد ايات سا لاکي دالم کتاب انجیل حق کات :

سموا کتاب ۲ ني وحي درفد توهن کا مائسي ،
 فس اد فائده انتوق اجر اورڱ ، انتوق بنتوق
 مان ۲ حق بيلق ، انتوق بايقي مان ۲ حق ساله ،
 فس انتوق تنجوق اجر جالن هيدوف حق بتول
 د فنداغن توهن . دغن مڱاجي کتاب ني له ،
 اورڱ حق کرج کا توهن بولي ه کفنداين حق
 چوکوف سمفرن ، فس دوق سيمفن سيف ده ،
 نق بوات سموا کرج حق بايک . (2 تیموتيوس 3:16، 17)

فرهاتيله ايات سا لاکي :

فرکتان حق توهن تا ماتي بوات سلام ۲ .
 (1 فیتروس 25:1)

ايات تو بولييه باچ دالم كتاب فرجنجين لام ،
فس توهن بري اڱكيت سمولا ايات هق تولا دالم
كتاب انجيل .

اديق كاكق تاء كنا شك هاتي . فركتان هق توهن
دولو سروف دغن هق بارو . دي تاء ماتي كدوا ۲ .
سبب تو سوغ فاتوتله سموا اورغ كنا باچ كنف ۲
بواه كتاب هق تورون ماري درفد توهن .

سوأل ۶

کالو کتاب فرجنجين لام تاء ليسوس ، اف
فائده کتاب فرجنجين بارو فول ؟

جوابش

موليق کيت فريقسا تيغوق کتاب فرجنجين لام
دغن کتاب فرجنجين بارو ، فس تاش ديري سنديري :
دوا بواه کتاب تو بري تاهو حال فرجنجين هق مان ؟
سياف دي هق جنجي ؟

جوابش ، توهن سنديريله هق جنجي دغن
مائسي کيت . فس توهن جنجي لاگو مان ؟ بيلا
کيت باچ ده دالم کتاب تورا ، اتوا دالم کتاب
نبي ۲ دولو - يائيت دالم کتاب فرجنجين لام -
کيت نق بولييه تاهو هق توهن جنجي دولوجادي

بالس ني: توهن سنديرله هق نق بري مائسي
 سلامت، فس نق بري اورغ ۲ هق برايمان بوليه
 جادي قوم كلوارك هق توهن، هق بوليه كنل فس
 بوليه برهوبوغ دشن دي. فس سموا تو توهن جنجي
 كات دي نق بوات، بوكن دشن كرج مان ۲ هق مائسي
 بوليه بوات، دق، تافي دشن كران رحمة دشن
 كاسيهن توهن ساچ. كتاب فرجنجين لام رويت
 لاکو تو. اوه! فوجيله كا توهن!

فس بيلا كيت باچ دالم كتاب فرجنجين بارو
 فول - يائيت كتاب انجيل - كيت نمفق كات
 سروف تولا. هق توهن جنجي تا براوبه.
 ولو فون فرجنجين توهن هق لام دشن هق
 بارو تو سروف تولا، تافي كتاب فرجنجين بارو اد
 فايدة لاکو ني: سوغکوه فون جادي خبر هق تولا،
 تافي دالم كتاب انجيل كيت بوليه هوبوغ باچ، فس
 نق بوليه ارتي دشن چرف، خبر هق ني ۲ دولو مولاي
 رويت تو.

فس فول، كيت بوليه نمفق كات، هق توهن
 جنجي دولو كات نق بوات، دي فون بوات بري
 سمفرن ده. جالن سلامت انتوق مائسي، توهن
 بري سيف ده دشن سمفرن! اچو اديق كاكق باچ

فس فریقسا تیثوق سندیري !

فوجیله کا توھن ، دي حق تائبراوبه فس
تائبیاس موغکیر جنجي ! سوغکوله ، فرکتان توھن
تائ ماتي بوات سلام ۲ .

سؤال ۷

بشکالي اد اورغ کات : هاله ، حق تو سوغکوه .
تافي کتاب انجيل تاليه فاکي لاني . دي تائ
سروف دشن حق اصل . کيت دشردده اورغ
کيچيق کات اد اورغ توکر دي ده . اد حق
فوتوغ بري کورغ ، حق تمبه فون اد جوک .
جادي ، ماس لاني حق سديا ستغه ، حق
فلسو ستغه . کيت نق تاهو حق سجاتي
لاکو مان ؟ حق فلسو لاکو مان ؟ تاليه
تاهو . سبب تو تائترفاکي . بائیک کيت
تائسه باچ ، بوکن ؟

جوابن

بوليه باچ ، سبب حق اورغ ۲ کيچيق لاکو تو
تائسوغکوه . کالو سوغکوه تروق ساغت . سبب
توله ، موليق کيت فریقسا دشن هالوسي ۲ .
سوغکومله اد جوک اورغ حق منودوه کات کتاب

توهن تو اورځ اوبه ده ، تاُسروف دښن هق سديا .
تافي کيت کنا فهم دولو توجوان دي کيچيځ لاکو
تو ، هق مان دالم دوا ني :-

1. توجوان دي تودوه تو ، دي نق کات اد اورځ هق
نق تيفو ، هق توکر دښن سڅاج مقصود اتوا
ايسي کتاب توهن .

2. اتوا دي توجو کا کځ اهلي ۲ کتاب ، بيلا فواق تو
دوق توليس نق بري اد بايق بواه ، اتوا فون
کځ دي دوق باليق کتاب درفد بهاس اصل کا
لغة ۲ هق اورځ کيچيځ ماس لاني ، کات اد هق
سيلف .

1. کيت نق جواب هق فرتام داتس دولو .

اورځ کريستين جامين کات دي تاُ توکر کتاب
توهن . اورځ کريستين کاسيه کا فرکتان توهن ، فس
جاک دښن حرمة کا دي . تنتوله اورځ کريستين
سنديري تاُ توکر . فس فول دي تاُ جوځ جوک بري
اورځ جاهت هق هينا کا توهن توکر کتاب توهن
هق سوچي تو .

فواق کريستين دوق ايغت سعمور ۲ کا فسنن
توهن کوُ ني موسی دالم کتاب توراۃ لبيه فد

تيگ ريپو تاهون ماري ده ، کات : جاځنله فواق مو
تمبه ساتو فاته فون کا فرکتان هق اکو توهن فسن
کا مو . سروف تو جوگ ، جاځنله فواق مو فوتوځ
بري کورځ فون .

لفس فد تو براتوس ۲ تاهون لاکي ، توهن بري
تاهو کو ايات کتاب نبي سليمان لاکو ني ، کات : کنف
فاته فرکتان هق توهن تو سوچي . جاځنله فواق مو
تمبه ايسي فرمان توهن تو ، تاکوت توهن جاتوه
حکوم اتس مو ، کات بوهوځ .

فس فول دالم کتاب انجيل ، هق توهن بري دکت
دوا ريپو تاهون ماري ده ، امران هق سود کات :

اکو يحييا نق فرايشت بري امران دځن کرس ،
کا اورځ مان هق دځر فرمان توهن هق اد
توليس ده دالم سورت ني . کالو سياف ۲ تمبه
لبيه فد هق ني ، توهن فون نق حکوم دي دځن
تمبه بالا ۲ سروف هق اد توليس ده دالم
سورت ني . فس کالو سياف ۲ بري کورځ فد
هق ني ، توهن نق امبيق کليق درفد اورځ تو ،
بهاکين دي دالم فوهون کايو هق بري هيډوف ،
.....

دڏڻ بهائين دي بوليہ ماسوق دالم کوت هق
 سوچي تو ، هق دوق توليس ده دالم سورت
 ني . (هق توهن بري پات 22 : 18 ، 19)

جادي، دڏڻ کران توهن لارڻ برت بالس تو، کيت
 بوليہ جامين کات اورڻ کريستين تاءُ توکر سام سکالي
 کتاب توهن درفد هق سديا . فس ، کالو اورڻ جاهت
 فون نق توکر ، بالس مان نق بوليہ بوات ؟ تنتو
 بريبو ۲ اورڻ کريستين هق دوق باچ کتاب هاري ۲
 دڏڻ بهاس دي سنديري تو ، کنا تاهو . دق ! تنتوله
 کالو اورڻ جاهت بوات مغيانه کا کتاب توهن تو،
 اورڻ کريستين کنا تاهو جوڳ .

2. لاني کيت نق جواب هق کدوا دموک 15 سائي ،

حال ۲ اورڻ ۲ هق دوق شک هاتي ، تاکوت کتاب
 انجيل تاءُ ترفاڻي ده ، سبب اد کسيلفن هق تاءُ
 سڄاچ تو . (چوب باليق ، باچ سمولا دموک 15 دولون)
 کيت نق جواب بالس ني :-

بيلا اهلي ۲ کتاب نق توليس اتوا فوکل بري
 اد بايق بواه کتاب ، اتوا فون ، بيلا دي نق باليق
 کا بهاس ۲ لائين ۲ ، کالواد هق سيلف ، سفاته

دوا ، اتوا اد کسيلفن سيکيت ۲ ساج . فس سمو
ني اهلي ۲ کتاب دوق قريقسا سعمور . با تمو ،
دي بائيکي سلالو بري موليق .

اديق کاکو کنا فهم کات اد بريبو ۲ بواه کتاب
سوچي هق کنا باليق درفد هق سديا کا براتوس ۲
بهاس لائين ۲ ، امبيق دماس زمان دولو لاکي ،
فس کيت فريقسا ده ، بوليه جامين کات تا اد
داليل اف سکارا هق اورغ تودوه کات مقصود
ايسي کتاب توھن هق سديا کنا توکر ده .

بشکالي ادیق کاکو سوک تيغوق کمبر هق اورغ
فوکل ، ايات ۲ دالم سبواه کتاب انجيل هق اد
لاکي سمفي کا ماس لاني فون . عمور دي 1,500
تاهون . اينيله کمبر :-

ΕΝΑΡΧΗ ΗΝΘΛΟΓΟΣ ΚΑΙ ΘΛΟΓΩΝ
ΤΙΡΟΤΟΝΘΗ ΚΑΙ ΘΣΗΝΘΛΟΓΟΣ .
ΟΥΤΟΣ ΗΝ ΕΝΑΡΧΗ ΤΙΡΟΤΟΝΘΗ
ΠΑΝΤΑ ΔΙΧΤΟΥΕΓΕΝΕΤΟ ΚΑΙ ΧΩ
ΡΕΙΣ ΑΥΤΟΥ ΕΓΕΝΕΤΟ ΟΥΔΕΝ
ΟΓΕΓΟΝ ΕΝΕΝΑΥΤΩ ΧΩΗΗΝ
ΚΑΙ Η ΖΩΗ ΗΝ ΤΟ ΦΩΣ ΤΩΝ ΑΝΩΝ
ΚΑΙ ΤΟ ΦΩΣ ΕΝ ΤΗΣ ΚΟΤΙΑ ΦΑΙ
ΝΕΙ ΚΑΙ ΗΣ ΚΟΤΙΑ ΑΥΤΟΥ ΚΑΤΕ
ΛΑΒΕΝ .

ايات ۲ دالم کمبر تو ، امبيق د کتاب انجيل سورت يحييا
باب ۱ ، ايات ۱-۵ . سبواه کتاب تو اورغ توليس دشن

بهاس ڪريڪ ، فس توليس دڻن تاڻن ، سبب
 ماس تو اورڻ تاءُ فندي فوڪل سورت لاکي . اد
 جوڪ ڪتاب انجيل لاکي ، هق عمور لام لبيه خدهق
 سائني لاکي . اهلي ۲ ڪتاب، هق فندي بهاس ڪريڪ ،
 باچ ده ڪتاب ۲ لام تو ، کات ايسي دي سروف ،
 ستوجو سوڻگوه دڻن ڪتاب انجيل هق دوق
 فاکي ماس لاني .

سبب سموا فرکارا توله ، کيت جواب دڻن
 هاڻي اخلاص کات ، ڪتاب ۲ سوچي هق توهن تو ،
 بوليه هارف کا دي لاکي ، بوکن دي تاءُ ترفاکي .

سوال هق کيت نق تان کا اورڻ هق شڪ هاڻي لاکي
 کالو باس اد اورڻ هق شڪ هاڻي نق بحس لاکي،
 کيت مينتاءُ معافله فس تان دي : کالو اد اورڻ نق
 منودوه اتس ڪسلاهن اورڻ لائين ، مستي اد
 داليل اتوا سقسي ، بوکنکه ؟ کالو تاءُ اد تاءُ ليه
 فڻڻ بوکو. سبب توله نق تان اورڻ هق نق بحس
 تو سيکيت :-

1. اديق کاکق چم دمان کات ڪتاب انجيل کناتوکر
 تو؟ اد داليل کا دق ؟

2. اديق کاکق بوليه کا دق روپت نام اورڻ هق نائيڪ

سقسى كات دي پياس تمو سبواه كتاب انجيل
 حق ايسى دي تاء توكر لائي ؟ دوق دمان كتاب
 انجيل حق سوغكوه تو؟

3. سياف دي حق توكر؟ دي توكر بيلا ؟ توجوان
 دي لاکو مان بوات جاهت سروف تو؟

ايكوت فهامن كيت تاء اد داليل مان ۲ ، فس
 سقسى فون تاء اد جوک . هومبي حق اورغ منودوه تو
 فون ، کيت سنديري چاري تاء تمو .

سود سکالي

معلومله توجوان توهن بري کتاب ۲ ني ، دي
 نق بري اديق کاکق بوليه تامو فرکتان توهن . کالو
 بالس تو ، تنتو توهن جاگ فرکتان دي بري
 ترفاکي . سبب توله اديق کاکق سوغ باچ .

انتوق کيت هق باچ ده کتاب توهن تو ، نق
 بوليه نايک سقسي کات اد فايده بايق کا اورغ باچ .

اد ايات دالم کتاب انجيل ، سورت هق سود
 سکالي ، هق رویت بالس ني :

براونتوغلله اورغ هق باچ کتاب ني بري اورغ
 دغر . اورغ هق دغر فون براونتوغل جوگ ، کالو
 دي توروت فرکارا ۲ هق توليس ده تي .
 (هق توهن بري پات باب 1 : 3)

કાલો અદિક કાકી નક સિવાહ ક્તાબ અનિલ
 બહાસ જાવિ લફે ફતાઈ , બ્રહ્મબોઘલે

દઘન

કુરુ ૨ ક્તાબ અનિલ

તુ. પ. ન. 20

૦. સાયબરી ૦4110

જ. પતતાની